

Universitäts- und Landesbibliothek Tirol

Franz Schwegger's Chronik der Stadt Hall

Schwegger, Franz

Innsbruck, 1867

Wälsch kriegsvolkh

1546 der claussn Erzburg zue ziehen mit sambt andern gsandten aus den stettn und grichtn im obern und undern Inntal. Die unsern seind am andern tag hinauff zu der claussn gsandt worden. Mer ist an disem tag zu Hall nachmittag ankumen graff Fridrich und sein sun von Fürstberg auch ain freyherr von Geroltzegg, ain junger Truckhsäs, des bischoffs von Augspurg brueder, all mit 50 graisigen pfärdten und guettn reittern, mit irem harnisch wol geputzt. Seind über nacht zue Hall pliben, den zweiten tag auff dem Innstram der kays. mjt. zue gfare.

Am 18. August umb 2 nachmittag ist zu Hall ankumen der cardinal Ferness mit 800 graisigen pfärdten, der merer tail graffn, mit sambt 2 herzog Salmano, auch 2 bischoffn und vil römischen wälschn adl. Hat auch 32 teütsch trabanten, wol klaidt auff teütsch ghabt, auch 10 welsch edlknaben auf hübschen pfärdtn und vil maulösln mit güettern gladen. Hat auch trefflich vil silbergschier mit gefiert und praucht. Der maist tail seines volks ist am andern tag über landt auff Wasserburg zu grittn und sein da gewart. Der cardinal Ferness ist zu Hall pliben 2 tag mit sambt dem postn adl, ist nachmals am 20. August in aller frue auff dem Innstram mit 9 scheffn auff Wasserburg zue gfare. Das gröst scheff hat alain güetter und raisstruchnen gefiert. Der cardinal ist im pfannhauss zu Haussegg glegen mit seinem hoffgsindt. Ist ain junger herr pey 28 jaren. Mer an disem tag durch Hall geritn ain junger graff von Zollern mit 10 graisigen pfärdtn, wol gerist, der kays. mjt. zue.

Wagenross.

Am 22. August seind durch Hall gangen 600 wagenross, gemustert zu Innsprugg, dem kays. mjt. geleger zue, auf Inglat.

Wälsch kriegsvolkh.

Am 26. und 30. August send zu Hall auff dem Innstram hinab gfare 3 grosse scheff mit vil volkhs wälschn, auch andern güettern, darunder der kays. mjt. profantmaister Franciscus de Thuarto.

Eroberung der claussn Erzburg von der landtschafft.

Am 5. Septembris ist die claussn und gschloss Erzburg von der landtschafft der grafschafft Tyrol wider erobert worden (mit